

HITZ BITAN

AFGANISTAN. Babesa eskatu dio nazioarteari

Herrialdea berreraikitzeke 15.000 milioi dolar beharko direla dio Munduko Bankuak

Erredakzioa | DONOSTIA

Datozen hamar urteetan Afganistan berreraikitzeke egin beharko diren lanetarako 15.000 milioi dolar beharko direla iragarri zuen atzo Munduko Bankuak. Lehen bi urteetan 5.000 milioi dolar inbertitu beharko direla esan zuen erakundeak. Horretarako laguntza eskatu zion Munduko Bankuak nazioarteko komunitateari. Japoniak, Europako Batasunak, Saudi Arabiak eta AEB Ameriketako Estatu Batuek osatzen dute Afganistan berreraikitzeaz arduratuko den taldea.

Osasun alorreko azpiegitura egokiak eratzea, haurrak eskolatzea, drogen kontrola ezar-

tzea eta herrialdean dauden minak kentzea dira Munduko Bankuaren arabera Afganistanen premiazko beharrak.

Segurtasun handiagoa

NBE Nazio Batuen Erakundeak atzo aditzera eman zuenez, segurtasunak hobera egin du azkenaldian Afganistan iparraldean nahiz hegoaldean. Hala ere, talibanen gotorleku nagusia izandako Kandahar hiriko hainbat eremutan oraindik talibanen jarraitzaileek osatutako talde armatuak daudela adierazi zuen erakundeak. Hala ere, segurtasun handiagoa dagoela eta horrek NBerekin lotutako hainbat agentziatako lau langile hirira itzultzea ahalbidetu duela jakinarazi zuen.



SERGEI GRITS / AP

Haur bat margotzen, bere ama etxe gisa erabiltzen duten dendan eserita dagoela, Mazar-i-Sharifen.

Pakistan eta Afganistan arteko mugan pilatuta dauden 13.000 iheslarien bizi baldintzak gero eta kaskarragoak direla adierazi zuen atzo Nazio Batuen Errefuxiatuentzako Goi

Komisariatuak. Hori dela eta, muga irekitzeko eskatu zion Pakistanango Gobernuari, iheslariak errefuxiatu guneetara iristea izan dezaten.

Bestalde, AEBetako solda-

duek arma biltegi bat aurkitu zuten Bagramgo aire basetik oso gertu. Hilabete baino gehiago egon dira *marine*-ak base hori erabiltzen, biltegia aurkitu gabe.

IRAN

Legebiltzarkide erreformista bat askatu dute diputatuen protestaren eraginez

Hossein Loghmanian kartzelan zen diputatu erreformazalea barkatzeko agindua eman zuen atzo Irango Gobernuak, Teherango Legebiltzarreko kideek protesta gisa saioak bertan behera utzi ondoren. Protestok Iranen Justiziaren eta Legebiltzarraren artean den lehiaren agergarri dira. Kontserbadoreek kontrolatzen duten justizia boterea iraintzeagatik espeteratu zuten Loghmanian hamar hilabeterako.

TXINA

Meategietan izaniko hiru istriputan 50 lagun hil dira

Txinako meategietan gutxienez 50 lagunek galdu dute bizia azken bi egunotan izaniko hiru hondamenditan. Azken istripuan 25 lagun hil ziren astelehenean lege kanpoko meategi batean leherketa bat gertatu zenean. Gobernuaren estatistiken arabera, 5.000 lagun hil ziren iaz Txinan meategi istripuetan.

FILIPINAK

Polizia eta Armada tiroka ibili dira elkarren aurka

Gutxienez 17 lagun hil ziren Jolo uhartean Nur Misuari buruzagi matxinoaren aldeko elkarretartze batean izaniko istiluetan Filipinetako marineak eta poliziak elkarren aurka tiroka ibiltzearen ondorioz. Agintariak istriputzat jo zuten gertaera.



AJAZ RAHI / AP

INDIA

Kaxmirko militanteen aurka Pakistanek «noiz ekingo zain» dagoela esan du berriz New Delhik

Kaxmirren borrokan ari diren taldeen aurka Pakistanek hartu beharreko neurrien zain dagoela Indiako Gobernuak esan zuen atzo Jaswant Singh Atzerri ministroak. Islamabadek 20 militante entregatzea nahi du New Delhik. Irudian Indiako Polizia auto bat miatzen Jammu eskualdean.

KANADA

Washingtonen hurbileko bat izendatu dute lehen ministrorde

Kanadako lehen ministro Jean Chretienek —irudian— Estatu Batuetako Gobernuarekin harreman estua duen gizon bat izendatu zuen atzo lehen ministrorde. Industria eta Atzerri ministro izaniko John Manleyk George W. Bushen gobernuarekin komunikatzeko ahalmen handia izan zuen ardura horietan.



DOUG MILLS / AP

TXETXENIA

NBEko errefuxiatuentzako goi komisarioa Errusiako ofizialekin bildu da iheslarien auziaz mintzatzeko

Ruud Lubbers NBE Nazio Batuen Erakundearen errefuxiatuentzako goi komisarioa Errusiako ofizialekin bildu zen atzo, Txetxeniako iheslarien auziaz eztabaidatzeko. Errefuxiatu gune bat ere bisitatu behar zuen Lubbersek. Moskuk eten egin ditu matxinoekin martxan jarritako bake negoziazioak, haiei armak utzi nahi ez izatea leporatu ostean.

KONGOKO ERREPUBLIKA DEMOKRATIKOA

Gutxienez 30 lagun hil dira meategi bateko leherketan

Gutxienez 30 pertsona hil dira Kongoko Errepublika Demokratikoaren ekialdean, meategi batean izandako eztandaren ondorioz. Ezbeharra gertatu zenetik astebete igaro denean, oraindik ez dituzte atera 36 lagun gorpuak meategitik, matxino talde baten esku baitago eskualde hori.

SRI LANKA

Tamil Tigreen kontrolpeko eremuan jarritako bahimendu ekonomikoa kendu du Gobernuak

Duela zazpi urte Talmil Tigreak gerrilla taldearen kontrolpean den Sri Lanka iparraldeko Vanni eskualdean ezarritako elikagai eta sendagai bahimendua kendu zuen Gobernuak atzo. Duela gutxi berriro martxan jarri den bake prozesuari jarraituta hartu du neurria Ranil Wickramasingheren gobernuak.



EUSKO JAURLARITZA
GOBIERNO VASCO

Kultura Sailak diruz
lagundutako egunkaria